

76. “ Tu vero uxoris memor, quæ menstruam ablutionem peregerat,
“ timensque ne officium tuum negligeres, vaccam honore dignam salutare
“ oblitus es.

77. “ ‘ Quia me contemnis, ideo tibi, antequam prolem meam honoraveris,
“ progenies non continget!’ Ita illa tibi imprecata est.

78. “ Imprecatio illa neque a te audita est, neque ab auriga tuo, propter
“ *Gangæ* cœlestis strepitum, in cujus flumine ludebant plagarum elephanti,
“ vinculis soluti.

79. “ Illius contemptu desiderium tuum prohibitum est : nâm neglectio
“ honoris erga eos, qui honore digni sunt, præcludit felicitatem.

80. “ Illa vero, ut PRACHETASÎ butyrum suppeditet ad diuturna sacra
“ peragenda, commoratur nunc in inferno, cujus janua serpentibus reli-
“ gata est.

81. “ Quare tu, purus, hancce SURABHIS filiam in ejus locum substituens,
“ eam venerare cum uxore tua : nam si propitia, omnimulga est.”

82. Ita loquente sacrificio, advenit e sylva NANDINIS, vacca haud sper-
nenda, cujus ope sacra ille peragere solebat.

83. Surculi instar tenera atque fusca, curvatam crinium alborum notam in
fronte gestavit, cœlo vespertino similis, in quo recens luna splendet.

84. Uberibus prædita, fontis instar plenis, solum rigavit lacte tepido, vel
aquam sacram puritate sua superante, atque quoties illa vitulum intuebatur
profluente.

85. Pulvere, qui illius ungulis excitatus regis corpus tetigit, tribuit ei
puritatem, qualis oritur ex ablutionibus in aquis sacratis.

86. VASISHTHAS, ominum gnarus, castigationum dives, conspiciens illam,
venustis oculis præditam, iterum allocutus est regem haud inania cupi-
entem, inducturus eum ad cærimoniam sacram peragendam :

87. “ Persuasum habeas, rex, felicitatem tuam non remotam esse : nam
“ fausta hæc vacca advenit, nomine ejus vix prolato.

88. “ Victu sylvestri degens, veluti scientiam studio, ita hanc vaccam
“ perpetuo eam sequendo tibi conciliare debes.